

आकाशवाणी

खास-खास खबरां:-

- प्रधानमंत्री नरेन्द्र मोदी होर अज्ज मुम्बई च फ्रांस दे राष्ट्रपति इमैनुएल मैक्रों हुंदे नै मिलिये भारत-फ्रांस रणनीतिक सांझेदारी च प्रगति दी समीक्षा करगन।
- रक्षामंत्री राजनाथ सिंह अपनी फ्रांसिसी हमरुतबा कैथरीन वाउटरिन हुंदे कन्नै 6में भारत-फ्रांस रक्षा संवाद दी अध्यक्षता करगन।
- सहकारिता मंत्री अमित शाह होर अज्ज गुजरात दे गांधीनगर च सब्भनें राज्ये ते केन्द्र शासित प्रदेशे दे सहकारिता मंत्रिये कन्नै “मंथन बैठक” लागन।
- सी.बी.एस.इ नै 10मीं दे विद्यार्थिये लेई बोर्ड दा दुए मतेहान रक्खने दी योजना बारे स्पष्टिकरण जारी कीते न।
- बी.एन.पी अध्यक्ष तारिक रहमान अज्ज ढाका च बंगलादेश दे नमें प्रधानमंत्री दे तौरा पर सगंध चुक्कगन। लोकसभा अध्यक्ष ओम बिरला भारत दी तरफा शपथ ग्रहण समारोह च होगन शामिल।
- ते भारत दे बाद श्रीलंका नै बी आई.सी.सी. टी-20 विश्व कप दे सुपर 8 च अपनी थाहर पक्की करी लैती ऐ।

<><><><><><>

PM- France Prez

प्रधानमंत्री नरेन्द्र मोदी होर अज्ज मुम्बई च फ्रांस दे राष्ट्रपति इमैनुएल मैक्रों हुंदे नै मलाटी करगन। इस दरान दवै नेता भारत फ्रांस रणनीतिक सांझेदारी च होई दी प्रगति दी समीक्षा करडन। मैक्रों होर अज्जे थमां भारत दी 3 दिनें दी यात्रा पर आवा करदे न। ओह नमीं दिल्ली च आयोजित भारत ए.आई इम्पैक्ट शिखर सम्मेलन च बी हिस्सा लेंगन। दौनें नेताएं दी मलाटी दरान चर्चा भारत ते फ्रांस बश्कार रणनीतिक सांझ भ्याली गी निग्गर करने ते एहदा नमें ते उभरदे क्षेत्रे तगर विस्तार करने पर केंद्रित होग।

मगरा दवै नेता भारत फ्रांस नवाचार 2026 दा उद्घाटन करंगन ते दौनें मुख्यें दे बपारिक नेताएं, स्टार्टअप्स, शोधकर्ताएं ते सरबंधत धड़ें दी सभा गी बी संबोधित करंगन।

<><><><><><>

PM- Kovind

प्रधानमंत्री नरेन्द्र मोदी हो'रें साबका राष्ट्रपति रामनाथ कोविंद हुं'दे कन्नै कल नमें बने दे प्रधानमंत्री दफ्तर "सेवा तीर्थ" च मलाटी कीती। सोशल मीडिया पर प्रधानमंत्री हो'रें आखेया जे साबका राष्ट्रपति रामनाथ कोविंद हुं'दे कन्नै मलाटी बड़ी गै सुखद रेई। उ'नें आखेया जे बक्ख-बक्ख विषे पर उन्दे विचार हमेशा गै गंभीर- विचारशील ते मार्ग-दर्शन आहले होंदे न। तोंआई- साबका राष्ट्रपति कोविंद हो'रें अपने सोशल मीडिया संदेश च आखेया जे नमें बने दे प्रधानमंत्री दफ्तर "सेवा तीर्थ" च प्रधानमंत्री हुं'दे कन्नै मलाटी करिये बड़ी खुशी होई। उ'नें ऐखेया जे एह भवन "नागरिक देवो भवः" दी भावना गी साकार करदा ऐ ते सेवा- करुणा- कर्तव्य ते "नेशन फसर्ट" दे सिद्धांतें दा प्रतीक ऐ। साबका राष्ट्रपति हो'रें अपने संदेश च देशवासिये गी शुभकामनां बी दितियां।

<><><><><><>

Defence Dialogue

रक्षा मंत्री राजनाथ सिंह ते फ्रांस दियां रक्षा मंत्री कैथरीन वाउटरिन अज्ज बैंगलुरु च 6में भारत-फ्रांस सलाना रक्षा संवाद दी संयुक्त रुपे नै अध्यक्षता करंगन। रक्षा मंत्रालय नै सोशल मीडिया पर जानकारी दिती ऐ जे बैठका च रक्षा सहयोग समझौते गी अगले 10 बरे लेई होर अगड़ा बदाने पर विचार कीता जाग। कन्नै गै हैमर मिसाइलें दे निर्माण आस्तै इक संयुक्त उद्यम स्थापित करने सरबंधी समझौता जापन पर दस्तख्त करने पर बी चर्चा होग।

<><><><><><>

Amit Shah-Cooperation Ministers

सहकारिता क्षेत्र च प्रमुख सुधारें ते विस्तार योजनाएं दी समीक्षा लेई अज्ज गुजरात दे गांधीनगर च सब्भनें राज्यें ते केन्द्र शासत प्रदेशें दे सहकारिता मंत्रियें दी इक उच्ची सतह दी बैठक लग्गोग। इनें योजनाएं च मुख्य भरै च प्रस्तावित दंडू लक्ख नमीं सहकारिता समीतियें दी स्थापना बी शामिल ऐ। एह इक चाल्ली दी “मंथन बैठक” होग- जेहदे च सारे किट्ठे बेइयें विचार-बटांदरा करगंन ते भविक्ख दी रुपरेखा गी मुकदा रुप देगंन। बैठक दी अध्यक्षता केन्द्री सहकारिता मंत्री अमित शाह होर करगंन। महात्मा मंदर दे सम्मेलन कक्ष च लग्गने आहले इस कार्यक्रम च मुख्य भरै दे सहकारिता मंत्रियें दे कन्नो-कन्नी अतिरिक्त मुख सचिव-प्रधान सचिव ते सचिवें जनेए वरिष्ठ अधिकारियें दे बी शामिल होने दी मेद ऐ।

<><><><><><>

Bio Asia2026 Summit

तेलंगाना दे मुखमंत्री ए. रेवंत रेड्डी अज्ज बायो एशिया 2026 अंतराष्ट्रीय शिखर सम्मेलन दे 23में संस्करण दा उदघाटन करगंन। दंडू दिनें दा एह सम्मेलन हैदराबाद अंतराष्ट्रीय कन्वेंशन सेंटर च लग्गै करदा ऐ- जेहदा विषय सार ऐ-“टैक बायो अनलिश्तु: ए.आई. ऑटोमेशन ते जीव विज्ञान च क्रांति”। एह आयोजन इस क्षेत्र च महत्वपूर्ण प्रगति ते उपलब्धियें पर चर्चा करने लेई दुनिया भरै थमां माहिरें वैज्ञानिकें ते उद्योग जगत दे नेताएं गी इक्कै मंच पर आन्नोग।

<><><><><><>

CBSE Class 10 New Rules

केन्द्री माध्यमिक शिक्षा बोर्ड सी.बी.एस.इ नै इस बरे लागू 10मीं दे बोर्ड मतेहानें सरबंधि योजना तैहत नियमें पर अधिकारिक पुष्टि जारी कीती। बोर्ड नै साफ कीता ऐ के पैहला बोर्ड मतेहान हर विद्यार्थी गी देना होग ते जेकर कोई विद्यार्थी पैहले मतेहान दे 3 जा ओहदे कोला मते पेपर नैई दिंदा- तां ओ दुए मतेहान च बौहने लेई योग्य नैई होग।

बोर्ड नै साफ कीता ऐ जे कि दुई बारी आहला मतेहान छड़ा- उनें विद्यार्थिये लेई होग- जेहडे पैहला पेपर पास करी लेंदे न ते उनेंगी लगदा ऐ जे इक बारी होर पेपर देइयै ओ बेहतर अंक हासल करी सकदे न- ओ एह मतेहान देई सकगंन। इस बारे नियमें दी तफसील विद्यार्थी सी.बी.एस.इ दी वेबसाईट पर बी दिक्खी सकदे न।

<><><><><><>

Birla -Bangladesh

बांगलादेश दी राजधानी ढाका च अज्ज बी.एन.पी. अध्यक्ष तारिक रहमान होर प्रधानमंत्री दे ओहदे दी सगंध लैगंन। शपथ ग्रहण समारोह च भारत दी तरफा लोकसभा अध्यक्ष ओम बिरला ते भारत दे विदेश सचिव विक्रम मिस्री शामिल होगंन। हाल च होए दे संसदीय चुनाएं च बांगलादेश नैशनलिस्ट पार्टी दे नेतृत्व आहले गठबंधन नै शानदार जित हासल कीती ऐ। विदेश मंत्रालय दा आखना ऐ जे इस महत्पूर्ण कार्यक्रम च ओम बिरला हुंदा शामिल होने जाना- भारत ते बांगलादेश दे लोकें बश्कार गैहरी ते पक्की दोस्ती गी दर्शादा ऐ ते कन्नै गै एह दौनें मुख्यें गी जोड़ने आहले लोकतांत्रिक मुल्ले-कट्टे गी लेइयै भारत दी प्रतिबद्धता दा बी प्रतीक ऐ।

<><><><><><>

Iran Atom Issue

ईरान दे विदेश मंत्री अब्बास अराघची नै कल संयुक्त राष्ट्र दी परमाणु निगरानी संस्था दे प्रमुख हुंदे कन्नै मुलाकात ही। एह मुलाकात तेहरान दे परमाणु कार्यक्रम गी लेइयै अमरीका कन्नै दुए दौर दी गल्लबात कीती। श्री अराघची होरें अंतर्राष्ट्रीय परमाणु ऊर्जा एजेंसी दे महानिदेशक राफेल ग्रॉसी कन्नै मुलाकात कीती। श्री अराघची होरें आखेआ जे ओ ओमान दे विदेश मंत्री बदर अल-बुसैदी हुंदे नै बी मिलडन जेड़े अज्ज मंगलवारें जिनेवा च अमरीका-ईरान वार्ता दी मेजबानी करा' रदा ऐ।

ईरान दे उप विदेश मंत्री माजिद तख्त-रवांची नै संकेत दिता ऐ जे तेहरान परमाणु मुद्दे पर समझौता करने आस्तै तैयार होई सकता ऐ पर ओह अमरीका दे नेतृत्व च लाए गेदे अंतरराष्ट्री प्रतिबंधें च ढिल्ल चाहंदा ऐ।

<><><><><><>

ICC-T-20 World Cup

भारत दे बाद श्रीलंका नै बी आई.सी.सी. टी-20 विश्व कप दे सुपर-8 च अपनी थाहर पक्की करी लैती ऐ। कल राती केंडी च आस्ट्रेलिया गी 8 विकटें कन्नै रहाइयै शानदार जित दर्ज कीती। आई.सी.सी टी-20 विश्व कप च कल त्रै मैच खेडे गो। पैहला मैच संयुक्त अरब अमीरात यू.ए.ई ते अफगानिस्तान बश्कार खेडेआ गोआ जेड़ा अफगानिस्तान नै 5 विकटें कन्नै जिती लैता। पैहले बल्लेबाजी करदे होई यू.ए.ई नै 20एं ओवरें च 9 विकटें दे नुकसान पर 160 रन्ज बनाए जेदे परते च अफगानिस्तान नै 19 ओवर ते 2 गेंदें च 5 विकटें दे नुकसान पर 162 रन बनाइयै मैच अपने नां करी लैता। दुआ मैच इंग्लैंड ते इटली बश्कार खेडेआ गोआ। पैहले बल्लेबाजी करदे होई इंग्लैंड नै 20 ओवरें च 7 विकटें दे नुकसान पर 202 रन बनाए ते इटली गी जित लेई 203 रन दा लक्ष्य दिता। परते च इटली दी टीम 20 ओवरें च 178 रन गै बनाई सकी ते इंग्लैंड नै 24 रन कन्नै मैच जिती लैता। त्रीया मैच श्रीलंका ते आस्ट्रेलिया बश्कार खेडेया गया। श्रीलंका नै टास जितियै पैहले गेंदबाजी करने दा फैसला लैता ते आस्ट्रेलिया नै 20 आवरें च 181 रन्ज बनाए। परते च श्रीलंका नै 18 ओवरें च 2 विकटां मोहाइयै 184 रन्ज बनाए ते मैच जिती लैता। अज्ज न्यूजीलैंड दा मकाबला कनाडा कन्नै आयरलैंड दा जिम्बाव्वे कन्नै ते स्कॉटलैंड दा मकाबला नेपाल कन्नै होग।

<><><><><><>

Weather

मौसम विभाग नै 18 फरवरी तगर तमिलनाडु, केरल ते लक्षद्वीप च हल्की बरखा दी पेशगेई कीती ऐ।

विभाग नै अंडमान ते निकोबार द्वीप समूह च बिजली ते तेज ब्हाएं कन्नै बरखा दी मेद दस्सी ऐ। विभाग नै आखेआ ऐ जे तटीय कर्नाटक, कोंकण ते गोवा च गर्मी ते गुम्मे आहला मौसम रौहग। तोआई,, दक्षिण-पश्चिम ते ओहदे कन्नै लगदे दक्खण-पूर्वी बंगाल दी खाड़ी ते ओहदे कन्नै लगदे पूर्वी हिंद महासागर दे किश हिस्सें च बी मौसम गडबडी आहला रौहने दी शेंका दस्सी गेदी ऐ।

<><><><><><>